

大校友之風尚

陳樹人

國府遷臺，以建設臺灣反攻大陸爲中心國策，連年各種事業，長足進步，我交大校友，率多參加建設各部門，亦具相當成績，不乏事實之表現。推其來由：一爲我儕同學，皆重專門之學識，具進取之精神，平時兢兢業業，致力於崗位工作，進而研求新知，不鶩高，不自滿，故一人不逮，衆志成城，日進不足，而月計有餘。二爲我儕同學皆重品德之修養，勵操守之廉潔，平時簡樸成風，清寒自處，縱環境之困難，不足以移其心，生活之艱苦，不足以變其節。所謂貧賤不能移，富貴不能淫，互相惕勵，蔚成風氣。以上兩點，均屬美德，上次月會李中襄學長特提出「守」之意義，尤先於「取」，語重心長，發人深省，蓋人必有所不爲，而後可以有爲，進取屬於有爲，而操守則有所不爲也。憶昔母校諸師長如唐蔚芝先生，清操績學，淡泊明志，盡瘁於交通人才之培植，實爲養成風尚之始基，春風化雨，斯有由來，國步艱屯，疾風勁草，安可不互勵以發揚之耶。